

四書經註集證

論語卷之八

朱熹集註

衛靈公第十五

凡四十一章

衛靈公問陳於孔子孔子對曰俎豆之事則嘗聞之矣軍旅之事

未之學也明日遂行

陳去聲

史記孔子世家孔子適衛入主蘧伯主家他日靈公問兵陳孔子曰俎豆之事則嘗聞之軍旅之事未之學也明日與孔子語見蜚鴈仰視之色不在孔子孔子遂行復如陳是歲哀公三年而孔子年六十矣左傳哀公十一年孔文子將攻太叔訪於仲尼仲尼曰胡簋之事則嘗學之矣甲兵之事未之聞也

陳謂軍師行伍之列

周禮大司馬中春教振旅司馬以旗致民平列陳如戰之陳辨鼓鐸鐃鐃之用鐃以通鼓鐃以節鼓鐃以止鼓以教坐作進退疾徐疎數之節遂以蒐田有司表貉貉謂同立表以爲祭故云表貉誓民鼓遂圍禁中夏教芟舍如振旅之陳遂以

苗田中秋教治兵遂以彌田中冬教大閱前期羣吏戒衆庶
脩戰法虞人萊所田之野爲表百步則一爲三表又五十步
爲一表田之日司馬建旗于後表之中羣吏以旗物鼓鐸鐸
鐸各帥其民而致質明弊旗誅後至者乃陳車徒如戰之陳
皆坐羣吏聽誓于前斬牲以左右徇陳曰不用命者斬之中
軍以鼙令鼓鼓人皆三鼓司馬振鐸羣吏作旗車徒皆作鼓
行鳴鐸車徒皆行及表乃止三鼓振鐸作旗車徒皆作鼓進
鳴鐸車徒皆坐又三鼓振鐸作旗車徒皆作鼓進鳴鐸車驟
徒趨及表乃止坐作如初乃鼓退鳴鐸且却及表乃止坐作
如初遂閱車三發徒三刺乃鼓退鳴鐸且却及表乃止坐作
如初以待田左傳桓五年王以諸侯伐鄭鄭伯禦之曼伯爲
祭仲足爲左拒原繁高渠彌以中軍奉公爲魚麗之陳先偏
後伍伍承彌縫拒者方陳魚麗陳名二十五乘爲大偏伍大
爲伍伍承偏之缺故曰彌縫戰于緡葛命二拒曰旂動而鼓
蔡衛陳皆奔王卒大敗莊四年楚武王荆尸戶陳也更爲楚
陳兵之法授師子載同焉以伐隨昭元年晉中行穆子敗無
終于太原將戰魏舒曰彼徒我車所遇又阨以什其車以十
人當一車之用必克請皆卒自我始乃毀車以爲行五乘爲
三伍以五乘之甲士之十五人分爲三伍爲五陳以相離爲
步卒爲五陳不相連屬便于進退兩于前伍于後專爲右角
參爲左角偏爲前拒兩伍專參偏皆臨時處置之陳法以誘
之未陳而薄之大敗之昭二十一年晉救宋與華氏戰于緡

上鄭翻華氏黨願為觀其御願為驚鶴皆陳名哀十七年
越伐吳吳禦之笠澤夾水而陳越子為左右句卒鈞伍相此
別為左右屯以為聲勢分吳軍而三軍精銳并力擊其中也
使夜或左或右鼓譟而進吳師分以御之越子以三軍潛然
當吳中軍而鼓之吳師大敗哀二十七年公為支離之卒
名以侵鄭國語吳晉會于黃池爭長乃戒令夜中服兵擐胃
係馬舌出火竈陳士卒百人為徹行行頭皆宮帥建肥胡
名奉文犀之渠櫓也十行一嬖大夫建旌提鼓十旌一將軍
載常建鼓萬人以為方陳中軍皆白常白旗素甲白羽之矰
望之如荼左軍皆赤常赤旗丹甲朱羽之矰望之如火右軍
皆元常元旗黑甲烏羽之矰望之如墨為帶甲三萬鷄鳴乃
定黃氏曰黃帝有五陳直陳屬木銳陳屬火圓陳屬土方陣
屬金曲陳屬水風后握奇經四為正四為奇餘奇為握奇後
人解云天地風雲之陳為四正龍虎鳥蛇之陳為四奇獨孤
及風后八陣圖記黃帝順煞氣以作兵法文昌以命將風后
握奇制勝作為陳圖故八其陳以定位云韜太公曰日月星
辰十柄一左一右一向一背此為天陳邱陵水泉亦有前
後左右之列此謂地陳用車用馬用文用武此謂人陳

俎豆禮器

人物備考 俎祭器 按俎所以載牲體者形如小檠朱漆兩端
中以黑長一尺八寸闊八寸高八寸五分禮明堂位 俎有虞

氏以枕夏后氏以歲殷以棋周以房俎祭統凡為俎者以骨為主骨有貴賤殷人貴髀周人貴肩凡前貴于後俎者所以明祭之必有惠也是故貴者取貴骨賤者取賤骨貴者不重賤者不輕示均也馮復京詩名物疏按俎之制有四虞曰樽斷木為四足而已夏曰歲中足為橫距之象殷曰棋如枳相之曲撓周曰房俎足下有跗如堂房其長皆二尺二寸廣二尺二寸高一尺其用之別甚多一曰薦腥謂豚解而腥之殊兩肩兩髀兩脂與脅為七體此上古之體也二曰薦燔謂體解而燔之又分豚解為十一體以湯燔之而不全熟此中古之禮也三曰薦熟以其所燔者先煮于錢既熟則以鼎重煮之升于俎此近代之禮也又割其餘以制之則有燔炙之惠俎由鼎而升有九聘禮牛一羊二豕三魚四腊五腸胃六鹿七鮮魚八鮮腊九是也去鮮魚鮮腊則為七俎矣公食大夫禮上大夫九俎下大夫七俎是也又去其二則為五少牢陳五鼎羊一豕二膚三魚四腊五腸胃從羊五鼎五俎是也又去其二則為三特牲三鼎牲鼎一魚鼎二腊鼎三亦有三俎是也此皆正俎天子諸侯大夫士之所以別也為俎骨有貴賤鄉飲鄉射禮賓俎脊脅肩肺主人俎脊脅臂肺之類是也又有陪俎非正俎則腳臠臠之三臠臠者羹也即鉶羹也生臠為腳羊臠為臠豕臠為臠又有所俎所以載心舌而燔之皆從獻之物故鄭箋以爲從獻之俎九俎皆進於神前其日既饗而反其餘於所俎者謂之尸俎尸俎之外又有主人十

婦祝佐賓長兄弟宗人衆賓及衆兄弟內賓宗婦公有司之
俎牲之升俎必有物以盛之意卽掌蜃之蜃器也主人受尸
酢之俎謂之胙俎其俎最尊天子之祭膳夫親徹之王賓客
禮食亦有焉按孔子自少時嬉戲俎豆習禮容及長而講
學以教弟子正平日所講明而切究者曰嘗聞謙詞

尹氏曰衛靈公無道之君也復有志於戰伐之事故答以未學
而去之

按世家季康子謂冉有曰子之於軍旅學之乎性之乎對曰
學之仲尼然則孔子未嘗不習軍旅曰未學者爲衛靈言之
也

在陳絕糧從者病莫能興從去聲

孔子去衛適陳興起也

通鑑前編問陳事史記重出在去陳之後非也蓋明年而衛
靈公卒無自陳反衛再見靈公之事也論語去衛在在陳之
前蓋得其實按世家謂孔子居蔡楚昭王使人聘之孔子
將往陳蔡發兵圍之於野不得行絕糧朱子謂是時陳蔡臣

服於楚安敢圍之據論語當在去衛如陳之時汪份大全云問陳絕糧既合為一章必是一時事朱子之說信為有徵

子路愠見曰君子亦有窮乎子曰君子固窮小人窮斯濫矣見賢通反

何氏曰濫溢也言君子固有窮時不若小人窮則放溢為非程

子曰固窮者固守其窮亦通

愚謂聖人當行而行無所顧慮處困而亨無所怨悔於此可見

學者宜深味之

莊子孔子窮於陳蔡之間七日不火食藜羹不糝顏色甚憊而弦歌於室顏回擇菜子路田如此者可謂窮矣孔子曰是何言也君子通於道之謂通窮於道之謂窮今抱仁義之道以遭亂世之患其何窮之為易困卦彖曰困而不失其所亨其惟君子乎

子曰賜也女以予為多學而識之者與女音汝識音志與平聲下同

子貢之學多而能識矣夫子欲其知所本也故問以發之

對曰然非與

方信而忽疑蓋其積學功至而亦將有得也

四書通集註子曾子曰知其真積力久將有所得此則曰積學功至亦將有得亦字是從曾子說來

曰非也子一以貫之

說見第四篇然彼以行言而此以知言也

謝氏曰聖人之道大矣人不能徧觀而盡識宜其以爲多學而識之也然聖人豈務博者哉如天之於衆形匪物物刻而雕之也

法言或問天曰我於天歟見無爲之爲矣或問雕刻衆形者匪天歟曰以其不雕刻也如物而雕刻之焉得力而給諸

故曰予一以貫之德輶如毛毛猶有倫上天之載無聲無臭至矣尹氏曰孔子之於曾子不待其問而直告之以此曾子復深

諭之曰唯若子貢則先發其疑而後告之而子貢終亦不能如
曾子之唯也二子所學之淺深於此可見愚按夫子之於子貢
屢有以發之而他人不與焉則顏曾以下諸子所學之淺深又
可見矣

子曰由知德者鮮矣

鮮上聲

由呼子路之名而告之也德謂義理之得於己者非已有之不
能知其意味之實也

自第一章至此疑皆一時之言此章蓋爲愠見發也

韓李筆解此句是簡編脫漏當
在子路愠見下文一段爲得

子曰無爲而治者其舜也與夫何爲哉恭己正南面而已矣

與平聲夫

扶音

無爲而治者聖人德盛而民化不恃其有所作爲也獨稱舜者
紹堯之後而又得人以任衆職故尤不見其有爲之迹也恭已
者聖人敬德之容旣無所爲則人之所見如此而已

子張問行

猶問達之意也

子曰言忠信行篤敬雖蠻貊之邦行矣言不忠信行不篤敬雖州

里行乎哉

行篤行不之行
去聲貊芒百反

子張意在得行於外故夫子反於身而言之猶答于祿問達之
意也篤厚也蠻南蠻貊北狄

周禮夏官職方氏辨九貉之人民
鄭司農註北方曰貊狄餘詳中庸

二千五百家爲州

周禮大司徒五黨為州使之相賙
送人五家為鄰五鄰為里餘見前

立則見其參於前也在輿則見其倚於衡也夫然後行參七南反

說文輿車底也周禮考工記輿人為車註為車稱與人車以輿為主也後漢輿服志上古聖人觀轉運始為輪輪行不可載因物生智後為之輿顧會詩詁云輶軸之上加板以載物軫試輶較之所附植輿其和名也

其者指忠信篤敬而言參讀如母往參焉之參

禮曲禮離坐離立毋往參焉離立者不出中間

言與我相參也衡輶也

正字通車輶曰衡小雅約軾錯衡餘詳大車無輶章

言其於忠信篤敬念念不忘隨其所在常若有見雖欲頃刻離之而不可得然後一言一行自然不離於忠信篤敬而蠻貊可行也

子張書諸紳

紳大帶之垂者

禮玉藻紳長制士三尺有司二尺有五寸子游曰參分帶下紳居二焉百虎通衣裳篇所以必有紳帶示敬謹自約整續繪爲結子前下垂三分身半紳居一焉以有繫帶者示有事也

書之欲其不忘也

程子曰學要鞭辟近裏著己而已

金仁山曰辟如行辟人之辟謂猶前驅者以鞭欄約人使開向一邊也

博學而篤志切問而近思言忠信行篤敬立則見其參於前在與則見其倚於衡卽此是學質美者明得盡查滓便渾化却與天地同體其次惟莊敬以持養之及其至則一也

子曰直哉史魚邦有道如矢邦無道如矢

史官名魚衛大夫名鱣

呂氏春秋注史鱣字子魚說苑靈公問于史鱣曰政孰爲務對曰大理爲務聽獄不中死者不可生也斷者不可屬也故曰大理爲務又仲尼曰史鱣有君子之道三不仕而敬上不祝而敬鬼直能曲于人左傳吳季札適衛見史魚悅之曰衛多君子未有患也家語困誓篇遽伯玉賢而靈公不用彌子瑕不肖反任之史魚驟諫而不從史魚病將卒命其子曰吾在衛朝不能進遽伯玉退彌子瑕是吾爲臣不能正君也生而不能正君則死無以成禮我死汝置屍牖下于我畢矣其子從之靈公弔焉怪而問焉其子以父言告公愕然失容曰是寡人之過也于是命之殯于客位進遽伯玉而用之退彌子瑕而遠之孔子聞之曰古之諫者死則已矣未有若史魚死而屍諫忠感其君者也可不謂直乎

如矢言直也史魚自以不能進賢退不肖旣死猶以尸諫故夫子稱其直事見家語

君子哉蘧伯玉邦有道則仕邦無道則可卷而懷之

伯玉出處合於聖人之道故曰君子卷收也懷藏也如於孫林

父甯殖放弑之謀不對而出亦其事也

左傳襄公十四年衛獻公戒孫文子即林父甯惠子即殖食皆服而朝日盱不召而射鵩于囿二子從之不釋皮冠而與之言二子怒孫文子如戚孫蒯入使公飲之酒使師曹歌巧言之卒章蒯懼告文子文子曰君忌我矣弗先必死并帑子戚而入見蘧伯玉曰君之暴虐子所知也大懼社稷之傾覆將若之何對曰君制其國誰敢奸之雖奸之庸知愈乎遂行從近關出孫子遂攻獻公公出奔齊二十六年衛獻公使子鮮為復國計與甯喜言曰苟反政由甯氏祭則寡人甯喜告蘧伯玉伯玉曰緩不得聞君之出敢聞其入遂行從近關出

楊氏曰史魚之直未盡君子之道若蘧伯玉然後可免於亂世

若史魚之如矢則雖欲卷而懷之有不可得也

子曰可與言而不與之言失人不可與言而與之言失言知者不

失人亦不失言

知去聲

子曰志士仁人無求生以害仁有殺身以成仁

志士有志之士仁人則成德之人也理當死而求生則於其心
有不安矣是害其心之德也當死而死則心安而德全矣

程子曰實理得之於心自別實理者實見得是實見得非也古
人有捐軀隕命者若不實見得惡能如此須是實見得生不重
於義生不安於死也故有殺身以成仁者只是成就一箇是而
已

子貢問爲仁子曰工欲善其事必先利其器居是邦也事其大夫
之賢者友其士之仁者

賢以事言仁以德言夫子嘗謂子貢悅不若己者

家語六本篇孔子曰吾死之後則商也曰益賜也曰損曾子
曰何謂也子曰商也好與賢己者處賜也悅與不若己者處
不知其子視其父不知其人視其友不知其君視其臣不知
其地視其草木故曰與善人居如入芝蘭之室久而不聞其

香卽與之化矣與不善人居如入鮑魚之肆久而不聞其臭亦與之化矣丹之所藏者赤漆之所藏者黑是以君子必慎其所與處者焉

故以是告之欲其有所嚴憚切磋以成其德也

程子曰子貢問爲仁非問仁也故孔子告之以爲仁之資而已

顏淵問爲邦

顏子王佐之才故問治天下之道曰爲邦者謙辭

家語子貢對衛將軍文子曰夫能夙興夜寐諷誦崇禮行不貳過稱言不苟是顏同之行也若逢有德之君世受顯命不失厥名以御于天子則王者之相也子西謂昭王曰王之輔相有如顏同者乎

子曰行夏之時

夏時謂以斗柄初昏建寅之月爲歲首也

夏小正正月初昏參中斗柄懸在下六月初昏正在上七月斗柄懸在下則旦鶡冠子斗柄東指天下皆春斗柄南指天

下皆夏斗柄西指天下皆秋斗柄北指天下皆冬筆談古者
正月斗杓建寅今則正月建丑但春為寅卯辰夏為巳午未
理自當然不須因斗建也緣斗建有歲差古人未有歲差之
法按天有北極北極之外為紫微垣垣之側有北斗北十
七星六星在垣內杓在垣外杓即斗之柄也每初昏時杓所
指之方則謂之建以所建之方即定為月之辰一歲十二月
斗柄所指十一月在正北子位十二月偏東北丑位正月又
偏東寅位二月在正東卯位三月偏東南辰位四月又偏南
巳位五月在正南午位六月偏西南未位七月又偏西申位
八月在正西酉位九月偏西北戌位十月又偏北在亥位在
克寬曰若遇閏月則指兩辰之閒饒雙峯曰天象難捉摸只
有初昏時可見目已落星初見于是時推測方有定若他時
候周流四方無可捉摸凡測星
辰都用初昏測日景都用日中

天開於子地闢於丑人生於寅故斗柄建此三辰之月皆可以
為歲首而三代迭用之

朱子曰邵子皇極經世書以元統會十二會為一元一萬八
百年為一會以會統運以運統世三十年為一世十二世為
一運三十運為一會初開一萬八百年而天始開又一萬八
百年而地始成又一萬八百年而人始生邵子于寅上方註